

I Sulate dob de Judio do Munur bé Jesu Kristowe

Enda gétiga tom de ké ati séménulate bé ni sulat, non i séménulate de énda sénulatén i dawét ne. Endob gétiga tom sénulatén dob de Judio do munur bé Jesu Kristowe. Sénulatén i ni inok fébagéré noy de fédew ro, non i de dumo ro do Judio fénrasay ro bero sabaf bé kéunur ruwe bé Jesuse funa ro éndaén odoro roy kitab i de Judio.

Dob ni sulat, wén i kétoroe bé Jesuse, Been i Nga i Tuluse, atin mélaw toow na fo gérотор бé de télaki brab de sénarigoy Tuluse muret бé kékéréh ne brab fiyon i Moisese. Wén soy kétoroe бé fénléhu i Jesuse fégétulak fégékédan бé de sala i de kékilawan. Mélaw éndaén kailangay de étew i témulake do ayam taloo no do ségiyo éntingayén. Wén soy kétoroe бé toow fo kailangay de étew i munure бé Jesuse non Been i kékédéway de étew mangéy dob Tuluse.

¹ Bé do gétah do gai, ménsébéréh i Tuluse бé de katufua tom do Judio fénagéwén dob de étew do sénarigo no muret бé kékéréh ne. Fénbéréhén bero médoor gule brab dob séségiyo-giyowe aguwon. ² Endob béléewe ni, dob de ni géfuray do gai, ménsébéréh dob betome fénagéwén dob tintuwe Ngaén. I Tuluse, fénlimbagén бé Nga ne niy kéluhanay éntingayéne, atin fénémili i Tulusey Beene waléy so gefe бé kéluhanane. ³ Atin i Nga i Tuluse ni, réméndaw бé barakat i Tuluse, non ségiléw so бé Tulusey ni Nga. Atin i Nga i Tuluse

ni, Beeney émfétause bé kéluhanay éntingayéne inok énda méalfa ro. Rigoné noy ni dob barakatane kékérén. Atin amun énggilid kénda noy sala i de kéilawan, ménséfule mangéy dob lawayo inok mésar fingé dob kuwonoy Tuluse inok méguléw.

⁴ Mélaw i Nga i Tuluse, ménwaléy toow na fo gérotor bé de télaki. Loo so bé ni, bé kéfédawét i Tuluse Jesusey Nga ne, giton toow na fo gérotor i Jesuse bé de télaki. ⁵ Non wén i Ménsulate Kékérén i Tuluse bénréhén dob Jesuse mano, “Beemey Nga guwe, béleewe ménwaléyu Bohém.” Bénréh i Tulusey ni dob Jesuse, éndob énda bénréhén de dob de télaki no. Atin wén soy Ménsulate Kékérén i Tuluse mano, “Begéney Boh ne, atin Beeney Nga guwe.” Bénréh i Tulusey fantag bé Jesuse, békén fantag bé de télaki. ⁶ Atin amun gédétén i gaiwe féuwit i Tulusey toowe fo gérotor Ngaén mangéy dob duniiae ni, ménbérén man mano, “I Beene, fatut féngadaféy kéluhanay de télaki gu.” ⁷ Endob ay niy kékérén i Tuluse fantag bé de télaki no mano, “I de télaki gu, sani de sugu-sugué ku, féwaléyé ku bero do réfuruh brab do aféy.” ⁸ Endob ay niy kékérén i Tuluse fantag bé Nga ne mano, “Beemey Tuluse brab méguléw taman sa taman. Métintu foy kéféguléw me. ⁹ Atin méimu go bé fiyowe, brab mérarék go bé tetee. Been i niy funa kuwe, sani Tulus me, ménémili Beem inok fégérotoré ku Beem bé de dumo mo. Atin fénoror gu so beem.” ¹⁰ Atin wén soy ségiyowe Ménsulat Kékérén i Tuluse dob Nga ne mano, “I Beeme, Kadnan, bé féganayo Beemey léménimbage bé duniiae. Atin rénigo moy lawaye

bé de kémérém. ¹¹ I duniyaе brab lawaye, méalfa ro moso, éndob i Beeme, méuyag go taman sa taman. I de ni waléy ro tafay ségiléw bé kégale. ¹² Ségiléw bé kékédét me bé kégale inok baliwana mo bé mantuwe de. Endob i Beeme, énda méfégalin go, atin énda i tamanay kéuyag me.” ¹³ Atin ménbéréh soy Tuluse dob Nga ne mano, “Sar go fingé dob kuwono kuwe ni taman fétabané ku Beem bé de sébanil Beem.” Endob énda bénréh i Tulusey ni dob de télaki no. ¹⁴ Mélaw, i de télaki, beroy do sugu-suguéy Tuluse saén. Enda gito gey bero, éndob suguéy Tuluse bero tétabang betom do étew gégedot bé umule magufusa tidéw dob Beene.

2

¹ Mélaw fatut fo fétuntayé tom i de toow kétoro énggelingoo tom, inok taus i kéunur tome de. ² Non toow i kitabe niray i Tuluse fénuwitén bé de télaki. Mélaw i kéluhanay de mémélis bé kitabe, ménkukum ro loo bé fatute. ³ Atin ségiléw so bé ni, tintu mékukum tom so amuk fédayaé tom brab énda odoro tom i kétoroe fantag bé fiyowe kéfukas i Tuluse betom bé de sala tom. I Kadna tome Jesus i sunguwe ménuret betom fantag bé ni kéfukas, sani amuk munur tom bé Jesuse, kédané noy de sala tom inok énda mékukum tom. Atin i de étew énggégélingo bé ni kéuret i Kadnane, bénréh roy toow fo toow i kéuret ne de. ⁴ Atin i Tuluse, fénggit no so toow i ni kéuret bé kéférigo nuwe bero do ségiyo-giyo do mékégaif bé barakat ne. Atin nirayén dob de ni muret i de kéfurungon sabaf bé kéfemanduoy Rémogor i Tuluse bero. Niray i Tuluse

beroy loowe bé kétaya nuwe de irayén dob séngae ségétew bero.

⁵ Atin béréhé ku begom i fantage bé mantuwe duniya gégumah moso. I Tuluse, énda fénémilién i de télaki méguléw bé ni mantu duniya. ⁶ Yamula fénémilién i de étew. Non wén i Ménsulate Kébéréh i Tuluse mano, “Tulus, sedek énda lifoté moy de étew? Non kéilawan ro saén. Sede mélaw ké fagifaté mo bero? ⁷ Fénggérifantadém bero bé de télaki singkow saén. Endob niraya moy de kéilawan bantugan brab fénfégadata mo bero. ⁸ Atin fénémiliém i de étew méguléw bé kéluhanay de éntingayén.” Been i niy Ménsulate Kébéréh i Tuluse. Mélaw gétiga tom féguléwoy kéilawaney kéluhanay éntingayéne, atin énda i éntingayén énda féguléwo no de. Endob gétiga tom so, béléewe ni énda séna méguléw i kéilawane bé kéluhanay éntingayéne. ⁹ Endob gido loo, gétiga tom i Jesuse fénggérifantad i Tuluse bé de télaki bé singkowe saén inok méléhu gantino noy kéluhanay de étew inok énda méléhu ro. Ménrigoy ni sabaf bé kégédaw i Tuluse. Atin béléewe, bantugén i Jesuse brab fégadatan fo toow sabaf bé kénédaya ne bé kénéfélhue de. ¹⁰ I Tuluse, lénimbagén i kéluhanay éntingayéne brab Beeney émfétause bé kéluhanane. Atin fiyoy rénigo nuwe bé kénédaya ne bé Jesuse. Mérasay, non sabaf bé kérasay ne, énda i kulang dob kénéfukas ne betom. Rénigoy Tulusey ni inok féwaléyé no betom médo do ngaén inok médayéw tom séréngan bé Jesuse taman sa taman. Non i Jesuse, Beeney aguwoy de étew inok méfukas ro tidéw dob de sala ro.

¹¹ I Jesuse, linisé noy de étew dob de sala ro. Atin i betome do ménlinisén dob de sala tom,

sétiman tomén Boh bé Jesuse, sani Tuluse. Been i niy funa Jesuse énda mémala no fédawété no betom do tuwaréyén. ¹² Non wén i Ménssulate Kébérhéh mano, “Tulus, béréhé kuy fantage bé Beeme dob de tuwaréy gu. Atin dayewé ku Beem dob kéluhanay de étew sélimud fengadafé ro Beem.” ¹³ Atin bénréh Jesuse so mano, “Sémarigu dob Tuluse.” Atin bénréhén so mano, “Ay niwu, begey i de nga i Tuluse nirayén dob Begéne.”

¹⁴ Atin i de betom do nga i Tuluse, méléhu tom non kéilawan tom saén. Been i funa Jesuse ménwaléy so kéilawan loo bé betome. Rénigo noy ni inok méléhu, inok bé kéléhu ne, énggébinasana noy Satanase, sani tidéwoy kéléhue. ¹⁵ Atin rénigo noy ni inok géfukasa noy kéluhanay de étew bé ménrugayén i kégilak ruwe méléhu. ¹⁶ Atin békén do télakiy tabanga nuwe. Yamula betom do séfu Abraham i tabanga nuwe. ¹⁷ Been i niy funa nuwe kailanga noy waléye ségiléw bé betome do tuwaréyén, inok Beeney waléye toow fo mégédaw brab tintu fo gésarigon gérotor fadi tom dob adafay Tuluse, inok gékédana noy de sala tom do kéilawan. ¹⁸ Atin mélaw, gétabana noy de étew téngkadé Satanase, non i Beene ténéngkad Satanase so brab toow fo fénrasayén.

3

¹ Do dumo gu do munur bé Kristowe, sani de sénéngkat i Tuluse batí moso dob lawayo diyo, fégitung gom i fantage bé Jesuse. Been i no sénugu i Tuluse mangéy dob duniyae ni. Sénuguén inok waléy gérotor fadi bé kékéngintulus tome dob Beene. ² I Jesuse ni, toow fo nodoro noy kéluhanay

de fénrigoy Tuluse de, ségiléw bé kéodoro Moisese
bé kéluhanay de galbékén dob de étew i Tuluse.

³ I étewe rémigo lawi, mas na émbantug bé lawie.
Ségiléw so bé Jesuse, mas na émbantug bé Moisese.

⁴ I kéluhanay de lawi, wén i do réménigo bero.
Atin Tulus i réménigowe bé kéluhanay étingayéne.

⁵ I Moisese, fiyoy rénigo nuwe amun sugu-suguén
dob de étew i Tuluse. Atin i rénigo nuwe ménwaléy
maak anlung i rigonéy Tuluse moso. ⁶ Endob
i Kristowe, Beeney Nga i Tuluse brab Been soy
sarigone méguléw bé de étew i Tuluse. Atin i
betome do munur de, betom i de étew i Tuluse,
amuk méégét i kéunur tome de brab amuk énda
mékédan i késarig tome de bé kéongot-ongot tome
de.

⁷ Non wén i Ménsulate Kébérélh i Ré mogor i Tu-
luse mano, “Amuk gélingoo kom i kébérélh i Tuluse
béleewe ni, ⁸ kagom fétégasén i de uléw gom loo
bé kétégas i uléw i de katufua kom amun ménika
ro bé kétayay Tuluse dob gonone énda i étew de
bati. Non ténengkad ro diyo i ketingkél i Tuluse.

⁹ Fiyon fo ké énggito roy de mémégaif do rénigo
gu bé ménfote folo gébélantuwa,” bang i Tuluse,
“ténengkad roy ketingkél guwe bé de tete adat ro.

¹⁰ Mélaw ménkérítu bero brab bénréh gu maku,
‘Démoyun ro mika bé kétaya kuwe brab énda fo
modor ro bé de sugu gu.’ ¹¹ Mélaw ménkérítu bero,
brab fénasada ku bero maku, ‘Enda géahur ro dob
gono kuwe inok gétérén ro moso séréngan Begén.’
” Been i niy kébérélh i Tuluse.

¹² Mélaw, do dumo gu, ingat gom inok énda i
ségétew begom waléy tete i itunga nuwe brab énda
munurén bé Tuluse. Non amuk loo bé ni, diguré

noy méuyage Tulus. ¹³ Yamula, fatut séféfiyo tom fédew sénga fuweh lokut wén sénay gai tom inok énda i ségétew betom énggégéfégakaran rémigo sala funa no waléy métégas i uléw ne. ¹⁴ Non amuk féégété tom i késarig tome bé Kristowe taman sa taman loo bé gétaho, toow fo gétlaus tom sédumon bé Kristowe.

¹⁵ Been i niy bénréh i Ménsulate Kébéréh i Tuluse mano, “Amuk gélingoo kom i kékéréh i Tuluse béléewe ni, kagom fétégasén i de uléw gom loo bé kétégas i uléw i de katufua kom amun ménika ro bé kétayay Tuluse.”

¹⁶ Ati de étew énggégélingo bé kékéréh i Tuluse, éndob natuho roy Tuluse? Beroy de étew do Judio do fénanangguwit Moisese tidéw Egipto. ¹⁷ Ati de étew kénritoy Tuluse bé ménfote gébélantuwa? Bero soy de Judio do ménsala dob Tuluse funa ro ménléhu dob gonone énda i étew de bati. ¹⁸ Beroy de étew fénasaday Tuluse mano, “Enda fakayén ké mahur ro dob gono kuwe inok gétérén ro moso séréngan Begén.” Non énda modor ro bé kékéréh i Tuluse. ¹⁹ Mélaw gétiga tom énda énggéahur ro non énda ménunur ro bé Tuluse.

4

¹ Fiyon fo ké énda géahur i de énggétah do étew, énda mékédan i fasad i Tuluse bé fakay géahur i de étew dob gonoy Tuluse témérén. Mélaw fatut mingat tom inok kéluhana tom géahur diyo. ² Non énggélingoo tom i Fiyowe Uret ségiléw bé kégégélingo i de katufua tom de. Endob fiyon fo ké énggélingoo ro, énda énggédot roy fiyowe non énda ménunur ro de. ³ Endob i betome do munur de,

géahur tom dob gonoy Tuluse inok gétérén tom. Endob i de étew do énda munur, énda fakayén mahur ro. Non wén i Ménsulate Kébérél i Tuluse mano, “Ménwaléyu mékérít, atin réménigowu fasad bé énda géahur ro dob gono kuwe témérén.” Bénréh i Tulusey ni fiyon fo ké méntafayén i gono nuwe, non ménggilidén i galbék ne tidéw bé kélémbag ne bé duniyae ni. ⁴ Non wén i Ménsulate Kébérél i Tuluse fantag bé géfitew ne gétérésangan mano, “Amun énggilid i Tuluse bé galbék ne, téménréne dob géfitew ne gétérésangan.” ⁵ Atin wén man i Ménsulate Kébérél i Tuluse mano, “Enda fakayén ké mahur ro dob gono kuwe témérén inok gétérén ro séréngan Begén.” ⁶ I de sungu étew énggégélingo bé Fiyowe Uret, énda énggéahur ro dob gonoy Tuluse, non énda ménahur ro. Mélaw wén i do ségiyo étew géahur dob gonoy Tuluse inok gétérén ro séréngan de. ⁷ Gétiga tom i ni non réménigo man ségiyo gaiy Tuluse inok géahur i de étew dob gono nuwe témérén. Non amun ménifus i ménrugaye néni gai tidéw bé gaiwe énda ménunur i de sungu do étew, fénbérél i Tulusey Datu Dabide mano, “Amuk gélingoo kom i kékérél i Tuluse béléewe ni, kagom fétégasén i de uléw gom.” ⁸ Atin fantag man bé de ni do sungu étew, amuk énggékangguwito Josuehe bero mangéy dob tintuwe gonoy Tuluse inok tintu gétérén ro, éndaén damén ménbérél i Tuluse fantag bé ségiyowe gai géahur i de étew dob gonoy Tuluse inok gétérén ro. ⁹ Mélaw gétiga tom géahur soy de étew i Tuluse dob gonoy Tuluse inok gétérén ro ségiléw bé kétéréy Tuluse dob géfitew ne gétérésangan amun énggilid léménimbag.

10 Non i kéluhanay de étew géahur dob gonoy Tuluse inok gétérén ro séréngan de, gétérén ro so dob de galbék ro ségiléw bé kétéréy Tuluse bé kélimbag ne. **11** Mélaw toow tom fo télamanén i mahure inok gétérén tom séréngan bé Tuluse. Katom félisén i kóbérén i Tuluse loo bé rénigoy de énggéétah do étew funa ro énda énggéahur.

12 I kóbérén i Tuluse toow fo barakatan brab miray bé umule magufusa. Ségiléw bé sundange toow fo murém. Non i kóbérén i Tuluse maak diléké noy de itunga tom brab de fédew tom. I Nga i Tuluse gétiga noy kéluhanane fantag bé betome. Gétiga noy itunga tome brab fédew tome. **13** I Tuluse gétiga noy kéluhanane, énda i éntingayén mébunéy dob Beene. Gito noy kéluhanane, fiyon i de rigoné tom. Mélaw wén mosoy gai kailanga tom témidég dob adafa nuwe brab bérén dob Beeney fantag bé kéluhanay de rénigo tom.

14 Mélaw fatut fo fétausé tom i kékégét i kénéunur tome bé Jesu Kristowe loo bé fénayag tome. Non wén i toowe fo fiyo gérotor fadi tom, sani Jesuse Nga i Tuluse, déméniat mangéy dob Tuluse. **15** Atin i ni gérotor fadi, toow fo gésobuto noy kélubay tome non kélawan tom saén. Non i Jesuse ménwaléy kélawan brab ténuak Satanase bé séngae gékélasi kétukawan de ségiléw bé betome, éndob énda fo énggésala i Jesuse. **16** Mélaw, katom mágilak fégédét dob mégédawe Tulus. Non méuray i na nuwe betom brab mégédaw betom, atin tabanga no betom dob de gai kérégénan tom.

5

1 I kéluhanay de gérotor do fadi, fénémilién bero

inok waléy ro do kéfédéway de étew mangéy dob Tuluse. I galbéke sénarig dob berowe, témulak ro dob Tuluse inok mékédan i sala i de étew. ² I de gérotor do fadi, do kéilawan ro saén atin mélubay ro. Mélaw gétingkélo roy de étew ké gésala ro atin méuray i na ruwe bé de étew gésala non énda gésobuto roy fatute. ³ Atin i de gérotor fadi, kéilawan ro saén, mélaw énda démoyun ro gérigo bé fatute. Mélaw kailanga roy témulake inok kédanéy Tulusey de karo sala ségiléw bé de sala i de ségiyo do étew. ⁴ Atin i galbék i gérotore fadi, toow fo fégadatay de étew. Atin énda i ségetéw étew géfémili bé kaane lowoh waléy gérotor fadi. Non Tulus saén i mémilie bé ati isuwe waléy gérotor fadi loo bé kéfémili ne bé Aarone bé do gétah.

⁵ Atin ségiléw so bé niy Kristowe, békén Been i ménémilie bé lowoh ne inok waléy gérotor fadi. Yamula Tuluse i ménémilie de, sani ménbéréhe dob Beene mano, “Beemey Nga guwe, béléewe ménwaléyu Bohém.” ⁶ Atin wén soy ségiyowe kékéréh i Tuluse mano, “Beemey ségétéwe fadi taman sa taman, ségiléw bé Melkisedeke.”

⁷ Amun ménbati sénay Jesuse dob duniyae ni, déménasal brab kéménrew ménfégédaw-gédaw dob Tuluse, sani géfukase de bé kéléhue. Atin fénggélingo i Tuluse non bénasana noy Tuluse brab nodoro noy kétayay Tuluse. ⁸ Fiyon fo ké Nga i Tulusey Jesuse, féngganadén i kéodore bé de sugu i Tuluse bé kérasaye énggéagéwo no. ⁹ Atin amun énggilid non i kéluhanay sénugu i Tuluse de, ménwaléy Been i mémukase bé kéluhanay de étew modor dob Beene inok gédoté roy umule

magufusa. ¹⁰ Atin tidéw béno, fénwaléy i Tulusey Jesuse gérotor fadi ségiléw bé fadie Melkisedek bé do gétah.

¹¹ Médooy gébérého keye fantag bé ni. Endob mérégén i kéfégésobute de dob begome non métana gom gésobut. ¹² Ménrugay gomén ménunur bé Jesuse. Mélaw fatut gomén damén do témoreo. Endob énda fakayén non taman so béléewe ni kailangan gom séna toroén inok gésobuto kom i de sungu kétoro fantag bé kébéréh i Tuluse. Fatut damén mama gomén bé de métégas do amaén, sani ménaléme kétoro, éndob taman so béléewe ni maak témutu gom séna. ¹³ I de témutu séna, do nga ro séna. Enda gésobuto roy kétoroe fantag bé kétintuwe. ¹⁴ Endob i de lukés, mama ron bé métégase do amaén. Atin gélolo ronén i fiyowe brab tatee sabaf bé kéfeganad ruwe de.

6

¹ Mélaw katomén séduli-dulién i de sungu kétoro fantag bé Kristowe. Yamula féganadé tom i de ménalém de. Endaén kailanga tom démoyun féganadén i de kétoro, loo bé fatut tagakéy de étew i de rigonén énda géfukasa no bero, brab fatut munur ro bé Tuluse. ² Endaén kailanga tom féganadén i kétoroe fantag bé kébautise, brab fantag bé kétégéne bé de bunbunan bé lala i kédasalane de, brab fantag bé kétébule i de étew, brab fantag bé kékukum i Tuluse taman sa taman. ³ Yamula féganadé tom soy de ménalém do kétoro, amuk tungkaséy Tuluse damén.

⁴ I de étew téménréni ro munur, éndaén gésénule ro man ségule. Bé do gétah, énggésobuto ronén i toowe kétoro fantag bé Jesuse. Brab énggédot ronén i niray i Tuluse fénagéw dob Kristowe brab énggédot ronén i Rémogor i Tuluse. ⁵ Bé do gétah, énggétiga ronén toow fo fiyoy kékérél i Tuluse. Brab énggétérédama ronén i barakat i Tuluse fégito no moso dob de mantu do gai. ⁶ Gido loo, ténaak roy de ni. Mélaw éndaén fakayén fégésénuleén ro man. Non maak séguleé ro man féléhuén i Nga i Tuluse. Mélaw fémalané roy Nga i Tuluse dob adafay de étew.

⁷ Ufama, i betome tidéw dob fantade ni do kéilawan ségiléw tom bé fantade démoyun méranaan. Amuk témunoh i de fiyo ohokén do amaén, féfiyonéy Tulusey no fantad. ⁸ Endob amuk féérukéy fantadey de suwar brab de kéeroon, énda i do lagaén. Mélaw tuwégéy gefee de. Ségiléw so bé ni, i étewe miring bé fantade ni, kukuméy Tuluse.

⁹ Mélaw, do dumo gu, fiyon fo ké loo bé niy kékérél guwe dob begome, gétiga ku taus gom rémigo fiyo loo bé fatute rigonéy de étew ménfukas dob de sala ro. ¹⁰ Toow fo métintuy adat i Tuluse. Enda mélfotén bé de fiyo rénigo gom brab kéimu gome bé Tuluse fénggito gom bé kétabanga kome bé de dumo gom munur bé Kristowe. Atin taman so béléewe niy kétabanga kome bero. ¹¹ Toow fo méuyot gey de ké fétausé kom kéluhanan i kégéror gome taman bé késéfule Kristowe, inok gédoté kom i kéluhanay inamé kome. ¹² Mika gey de ké waléy gom faukén. Yamula fatut iring gom i de étew do munur brab do témingkél. Beroy de étew gégédot

bé fénasad i Tuluse.

¹³ Fégitung gom i katufua tome Abraham. Amun fénasaday Tulusey Abrahame, énda i ségiyo toow na fo gérotor bé Tuluse inok usaré noy dawét ne fégésafaén. Mélaw nusar i Tulusey kaane dawét féngésafaén bé ni fasad. ¹⁴ Ménbéréh i Tuluse mano, “Fasada ku beem bé féfiyoné ku beem brab iraya ku beem médoó do séfuém.” ¹⁵ Atin téméningkél i Abrahame, mélaw énggédotén i fénasad i Tuluse de. ¹⁶ Amuk sémafa i étewe, usaré noy dawét i ségétéwe étew toow na fo gérotor bé beene. Atin géunur mélaw i de étew gégélingo de. ¹⁷ Ségiléw so bé ni, i Tuluse toow fo fénbagérén i fasad ne bé kérigo nuwe bé safa ne, inok i de étew fénasada no toow fo fégito no bero brab fégétiga no beroy énda émfégalin i fasad ne brab tintu fo tumané no. ¹⁸ Mélaw ruwo timan éntingayén i éndae fégaliné no. I sébaane de, been i fasad ne. Atin i géruwono nuwe, been i safa ne. Mélaw gétiga tom énda témugi i Tuluse. Mélaw i de betom do étew fédiyaga bé Tuluse, toow fo méégét i kéunur tome dob Beene loo soy inam tome bé gédoté tom i fénasad ne dob betome. ¹⁹⁻²⁰ Toow fo méégét i inam tome bé tumanéy Tulusey fasad ne betom. Non sénarig tom i nan dob Tuluse. Mélaw énda mékedan i kéunur tome de. Atin i funa nuwe énda mékedan i késarig tome de non wén i kékédéwa tom dob sékuloy Tuluse, sani Jesu Kristowe. Maak ménahur dob sibéy i Tuluse mangéy fingé bala bé rindunge dob lawi i Tuluse. Atin diyo mélaw dob sékuloy Tuluse. Ménwaléy gérotor fadi tom taman sa taman loo bé fadie féndawét Melkisedek bé do géyah.

7

¹ I Melkisedeke ni, beeney datu i ingéde Salem bé do gétah. Atin been soy fadie méngadaf bé toowe fo gérotor Tulus. Atin wén i no gai, ménsétiboh i Abrahame bé de ségiyo datu, sani de kéménéfo bé samung ne, atin énggéléléhu no bero. Atin bé lala Abrahame mule, énggébalaka noy Melkisedeke. Atin nongot Melkisedeke dob Tuluse, bé féfiyoné noy Abrahame damén. ² Tidéw béno, niray Abrahame dey géfoloe bé téhaba nuwe énggédotén dob de datu fénléhuén. I atag i dawéte Melkisedek, “Métintu Datu”. Atin non datu i Melkisedeke dob Salem, i atag i dawét ne so, “Datu Kémédan bé Késétibohe”. ³ Enda ménsulatén ké ati boh Melkisedeke taloo no ati idéng ne taloo no ati katufua nuwe. Atin énda so ménsulat i fantage bé kéumah ne taloo no fantag bé kéléhu ne. Mélaw maak Nga i Tuluse non énda gétigay de étew de ké ati tidéwo nuwe de taloo no ati ténamana nuwe de. Mélaw i Melkisedeke fadi taman sa taman.

⁴ Mélaw gétiga tom toow fo gérotor i Melkisedeke. Non fiyon i Abrahame sani katufua tome do Judio, nirayén i géfoloe bé téhaba nuwe énggédotén bé késétiboh ne. ⁵ I de fadi i de Judio, sani de séfu Lébi, séfu ro soy Abrahame. Sénugu i kitabe bero médot bé géfoloe tidéw dob de Judio. Mélaw éndot ro tidéw dob de dumo ro do Judio, fiyon fo ké do séfu Abraham ro so kéluhanan. ⁶ Endob i Melkisedeke békén séfu Lebiwe. Gido loo, éndotén i géfoloe tidéw dob Abrahame, atin nongotén dob Tuluse bé féfiyoné noy Abrahame. Rénigo noy ni, fiyon fo ké Abraham i étewe fénasaday Tuluse. ⁷ Atin gétiga tom, i étewe ongoté no dob Tuluse

bé féfiyoné noy ségétéwe étew, toow na fo gérотор
i nan étew. ⁸ I de fadi i de Judio médot bé géfoloe
tidew dob de dumo ro Judio, méléhu ro. Endob
i Melkisedeke, sani méndote bé géfoloe tidew dob
Abrahame, énda ménsulatén dob kébéréh i Tuluse
fantag bé kéléhu ne. ⁹⁻¹⁰ Atin amun niray Abra-
hamey géfoloe dob Melkisedeke, maak Lebi soy
méniraye. Non fiyon fo ké énda séna ménumah i
Lebiwe de, maak diyo séna dob lowoh i katufua
nuwe Abraham bé kégébalak ne bé Melkisedeke.
Atin Lebiy katufuay de fadi médot bé géfoloe tidew
dob de Judio. Mélaw giton bé ni, mas gérotor i kéfadi
Melkisedeke bé kékéfadi i de séfu Lebi.

¹¹ Amun niray i Tulusey kitabe dob de Ju-
dio, ménemili do fadi, sani de séfu Lebi, inok
beroy de gémamak bé kitabe. Endob amuk fakay
waléy métintuy kéilawane sabaf bé galbék i de fadi
tidew dob de séfu Lebi, éndaén damén kailangan
i ségiyowe fadi loo bé Melkisedeke, békén loo bé
kékéfadi Aarone sani séfu Lebiwe. ¹² Atin amuk
fégalinén i fadie, fatut so fégalinén i kitabe. ¹³⁻¹⁴ Atin
i Kadna tome Jesu Kristo, sani mantuwe fadi
bénréh gu, békén séfu Lebiwe. Yamula, Beeney
séfu Judahe, atin énda i ségiyo bé de séfu Judah do
ménwaléy fadi. Mélaw bé kéluhanay de séfu Judah,
Jesuse saén i ménwaléye de fadi. Non énda bénréh
Moisese de ké waléy do fadi i de séfu Judah.

¹⁵ Atin ménggiton fo toow bé amuk wén i mantu
fadi loo bé Melkisedeke baliwana no bé de séfu
Lebi, wén soy mébaliwanan bé kitabe niray Moi-
sese. ¹⁶ Atin i Jesuse énda ménwaléyén fadi
sabaf bé kitabe sénugu bé i de séfu Lebi saén

i waléye do fadi. Yamula ménwaléy fadi sabaf bé kébarakatay umul ne énda méléhuén taman sa taman. ¹⁷ Non wén i Ménsulate Kébérél i Tuluse mano, “Waléy go fadi taman sa taman, loo bé fadie Melkisedek.” ¹⁸ Mélaw i de tafay sugu fantag bé de fadi ménkédanén non énda i laga ro brab énda gétabanga ro betom. ¹⁹ Non i kitabe niray Moisese, énda fakayén ké waléy tom métintu sabaf bé kéodor tome de. Mélaw niray i Tuluse betom i mantuwe aguwon toow na fo fiyo. Atin sabaf bé ni, gégédét tom dob Tuluse.

²⁰ Atin saliyu na bé ni, ay niy ségiyowe funan mas na fiyoy mantuwe ni agéwon. Amun rénigoy Tuluse fadi i Jesuse, réménigo so safa dob Beene. Endob énda rénigo noy ni safa bé kérigo nuwe bé de séfu Lebi do fadi. ²¹ Endob i Jesuse, ménwaléy fadi bé safa i Tuluse mano, “I Begéne Kadnan, rigoné kuy fasade bé waléy go fadi taman sa taman. Atin énda fégaliné kuy kétaya kuwe.” ²² Mélaw sabaf bé ni safa i Tuluse gétila tom toow na fo fiyoy mantuwe aguwon rénigoy Tuluse inok tanggafé noy de étew, sani kéunur tome bé Jesuse.

²³ Atin ay ni ségiyowe funan mas na fiyoy mantuwe agéwon. I de fadi do séfu Lebi, kailangan médo ro non méléhu ro, atin amuk méléhu i ségéte de, kailangan wén i baliwa no. ²⁴ Endob i Jesuse, méuyag taman sa taman. Mélaw énda i baliwa no. ²⁵ Mélaw fakay géfukasa noy de étew tidéw dob de sala ro, sani de étew modor de mangéy dob Tuluse. Gérigono noy ni sénga tékélid taman sa taman. Non méuyag taman sa taman, atin mélaw wén i kékédéwa tom mongot dob Tuluse.

²⁶ Mélaw Jesus i gérotore fadi kailanga tom. I

Jesuse, mékétéfu brab énda i salaén. Enda ségiléwén betom do gésala. Atin amun déményiat i Jesuse, rénigoy Tuluse toow fo gérotor. ²⁷ Ségiyo foy Jesuse bé de ségiyo do fadi. Enda kailanga noy témulake dob Tuluse sénga fuweh inok mékédan i kaane sala, atin tidéw béno témulak man inok mékédan i de sala i de ségiyo étew. Non nirayén i sébaane tulakén, sani lowoh ne. Mélaw éndaén kailanga noy témulake. ²⁸ I kitabe niray Moisese, mémili do gésala étew inok waléy ro do gérotor fadi. Endob ménrugay tidéw béno, ménwaléy gérotor fadi i Nga i Tuluse non fénémili i Tuluse sabaf bé fasad ne bé safa ne. Atin i Jesuse ni, énda i salaén taloo no udenén kulang de. Atin ménwaléy gérotor fadi taman sa taman.

8

¹ Ay niy atag i kéluhanay de uret gey begom dob ni sulat. Wén i gérotor fadi tom loo bé nan nuret gu, Been i Jesu Kristowe. Diyo dob lawayo mésar fingé dob kuwonoy barakatane Tulus. ² Mélaw diyo i Jesuse rigoné noy galbék i fadie dob tintuwe lawi i Tuluse dob lawayo. Békén étew i réménigowe bé ni lawi, yamula Kadnan i réménigowe de.

³ I kéluhanay de gérotor do fadi, fénwaléyén bero do fadi inok miray ro do ayam tulakén dob Tuluse. Mélaw ségiléw so bé ni, i katome gérotor fadi, fatut wén i tulakén irayén dob Tuluse. ⁴ Amuk diniy Jesuse dob fantade ni, énda fakayén waléy fadi. Non wénén i do fadi do miray tulak loo bé fatute dob kitabe niray Moisese. ⁵ Endob i toowe, i galbéke rigonéy de fadi dob fantade ni, maak anlung i toowe galbék rigoné Jesuse dob lawayo diyo. Ségiléw so bé rénigo Moisese. Non amun gédétén

rigoné noy safute lawi i Tuluse, bénréh i Tuluse de mano, “Rigo mo loo bé falas i tintuwe simbaan dob lawayo fénggito gu beem dob tuduke.” ⁶ Atin i galbék Jesu Kristowe bé kéfadi ne toow na fo fiyo bé galbék i de fadi do séfu Lebiwe. Atin ségiléw so bé ni, i mantuwe aguwon rénigoy Tuluse inok tanggafé noy de étew toow na fo fiyo dob tafaye aguwon. Non toow na fo fiyoy fasade fégérigo bé mantuwe aguwon.

⁷ Amuk énda i kulang bé sunguwe aguwon, éndaén kailangan i mantuwe de. ⁸ Endob i Tuluse énda ménsuwatén bé de étew modor bé sunguwe aguwon. Non wén i Ménsulate Kébéréh i Tuluse mano, “Gégumah i gaiwe, bang i Kadnane, rigoné kuy mantuwe aguwon inok tayakufé kuy de étew do séfu Israel. ⁹ Békén loo bé sunguwe aguwon rénigo gu kay de katufua ro bé gaiwe fénanangguwit gu bero mésut tidéw Egipto. Non énda ménodor ro bé no aguwon rénigo gu bero. Atin féndaya gu mélaw bero, bang i Kadnane. ¹⁰ Ay niy mantuwe aguwon rigoné ku kay de séfu Israel dob de gai moso, bang i Kadnane: Sulaté kuy de kitab gu dob de itunga ro brab dob de fédéw ro. Atin Begéney Tulus ruwe, brab beroy de étew gu. ¹¹ Atin mélaw, éndaén kailanga no moso toroé ro dob de dumoroy fantage bé Begéne maro, ‘Fatut gétiga kom i Kadnane.’ Non i kéluhanay de étew, do gérotor brab do gérifantad, gétiga ron Begén. ¹² Atin fésagadé kuy de sala ro, brab éndaén tédemé kuy de tete rénigo ro.” Been i niy kébéréh i Tuluse. ¹³ Atin mélaw gétiga tom i sunguwe aguwon tafayén brab éndaén i lagaén, non bénréh i Tuluse bé wén i mantu de.

Mélaw gétiga tom éndaén méusar i tafaye de non ménkédanén.

9

¹ I sunguwe aguwon rénigoy Tuluse inok tanggafé noy de étew, wén i do suguén fantag bé kéfengadafe brab fantag bé fatute lawi féngadafan rigonéy de étew. ² Rénigo roy safute lawi féngadafan. Atin wén i ruwo timan sibéyén. I sunguwe de, féndawét “Mékétéfu gonon”, atin wén i solo de brab ahayan brab fan tulakén dob Tuluse féndiyo dob ahayane. ³ Dob bengaway ni lawi wén i rindunge de. Atin wén soy rindung fégétéléb bé bengaway géruwonoy sibéy ne. Atin i ni sibéy féndawét “Toow fo Mékétéfu Sibéy”. ⁴ Diyo wén i bélówone ahayan gonon témuwég bé dukahe. Diyo soy baule méntéléb bé bélówone. Atin i baule ni, been i niy tandaé bé fasad i Tuluse. Dob ni baul wén i bélówone binangga nahuron bé amaéne féndawét “mana”. Atin diyo so dob baule niy tugé Aarone déméraun. Atin diyo soy de lumfayfay do batéw sénulatay Tuluse bé kitab ne. ⁵ Dob rotor i baule ni, diyo féntindég i de kéninontow i de barakatan do télaki émfégétigan bé diyo i Tuluse. Atin ménbékah i defafak ro dob rotor i gonone firikon bé darae fégékédan bé de sala. Endob énda kailangan fégétiga key begom i kéluhanay de fantag bé ni gonon bèleewe ni.

⁶ Atin amun ménlosoén i kéluhanane loo bé ni, mahur i de fadi dob sunguwe sibéy féndawét “Mékétéfu gonon” sénga fuweh inok rigoné roy galbék ruwe. ⁷ Endob gérotor fadi saén i géahure dob géruwowe sibéy féndawét “Toow fo Mékétéfu

Sibéy". Atin ségule saén mahur sénga ségbélintuwa. Atin amuk mahur diyo, muwit dara tulaké no dob Tuluse inok mékédan i de salaén rénigo no do énda énggétiga no de, brab de sala rénigoy de dumo no do Judio sani de sala énda énggétiga ro rénigo ro. ⁸ I kéluhanay rigonéy de fadi ni, ténero i Rémogor i Tuluse de betom bé amuk wén sénay sungu sibéy, énda séna fakayén géahur i de étew dob géruwowe sibéy féndawét "Toow fo Mékétéfu Sibéy". ⁹ I de ni maak do anlung i de gai saén béléewe ni. Fégétiga no betom bé i kéluhanay de iray dob Tuluse brab de ayam do tulakén, énda gékédana roy de sala. ¹⁰ Non i ni kéféngingtulus, fantag saén bé de sugu bé atiy géamaay de étew brab géinémo ruwe, brab fantag so bé de kéurah ro bé de lowoh ro. Endob i de ni do sugu kay de lowoh ro saén, énda gékédana noy de sala ro. Tafayén i de ni do sugu, mélaw usarén saén taman dob gaiwe fégalinéy Tulusey aguwone.

¹¹ Endob i Kristowe, énggumahén brab ménwaléyén gérotor fadi i mantuwe aguwon toow na fo fiyo bé tafaye de. Atin i lawie féngadafan galbéko no, toow na fo fiyo bé tafaye de. Békén rénigoy de étew brab énda dini no dob fantade ni. ¹² Atin ménahur i Kristowe dob Toowe fo Mékétéfu Sibéy ségule saén non éndaén kailanga noy mahure man. Atin békén do dara kambing taloo no do dara nati safi i uwité nuwe fégétulakén dob Tuluse. Yamula nuvitén i kaane dara fégétulakén dob Tuluse. Atin mélaw ménfukas tom tidéw dob de sala tom taman sa taman. ¹³ Bé do gétah, dara kambing brab dara safi brab awéw i natiwe safi i firikéne dob de étew do mékérésik dob kéféngintulus i de Judio. Atin tidéw béno, éndaén mékérésik ro.

¹⁴ Atin amuk waléy malinis i ségétewe étew bé dara i de ayam, toow na fo fiyoy gérigonoy dara Jesu Kristowe. Non sabaf bé kétabang i Rémogor i Tuluse énda i tamana no, nirayén i lowoh ne fégétulak dob Tuluse. Non énda i tete dob Kristowe, fiyon kloh. Atin i dara ne, linisé noy de fédew tom dob de sala tom atin kédané noy késarig tome bé adate énda i lagaén. Atin mélaw gérigono tom i galbék i méuyage Tuluse.

¹⁵ Atin been i niy funa Kristowe ménwaléy kéfeduwa tom inok rigoné noy ni mantu agéwon inok tanggaféy Tulusey de étew. Mélaw i kéluhana tome do fénemili i Tuluse, gédoté tom i kéfyonone taman sa taman loo bé fénasad i Tuluse. Fakay i ni mérigo non wén i kéléhu, sani kéléhu Jesu Kristowe, kémédan bé de sala tom rénigo tom bé lala tome séna ménodor bé tafaye agéwon.

¹⁶ Ufama, wén i ségétew étew rémigo sulat bé lala ne séna méuyag. Sénulatén ké ati gégédote bé de tamukén féledé no ké méléhu. Atin amuk ménléhuén i ni étew, kailangan wén foy émféféngintoow de ménléhuén. Tidew bénou, i étewe gégédot bé tamuk ne, gédoté no loo bé kékéréh i sulate. ¹⁷ Endob amuk méuyag sénay ni étew réménigo sulat, énda i laga i ni sulat. Non wén saén i atagén ké méléhuén. ¹⁸ Atin ségiléw so bé niy tafaye ni aguwon rénigoy Tuluse. Non kailangan wén i dara inok mélédan i de sala. ¹⁹ Dob sunguwe de, bénréh Moisese dob de étew i kéluhanay de sugu tidew dob kitabe. Tidew bénou, éndotén i dara i de nati safi brab kambing atin sénlawékén bé wayége. Tidew bénou, fénreén i bubul i bili-biliwe

fénfuro no, brab fénreén soy klohe fongoy kayéwe féndawét isob. Atin tidéw béno, fénirikén dob de étew brab fénirikén so dob librowe sénulatan bé kitabe.²⁰ Atin bé lala Moisese mémirik, ménbéréh mano, “Ay niy darae tanda i aguwone rénigoy Tuluse inok tayakufé no betom. Atin fatut odoro tom i ni agéwon non sénugu i Tuluse.”²¹ Atin fénirik Moisese soy darae dob safute lawi féngadafan, loo so dob kéluhanay de gamit usarén bé kéféngintuluse.²² Géfédew kéluhanay éntingayéne ténero i kitabe fatut firikon bé dara i ténu lake inok waléy ro malinis dob adafay Tuluse. Atin amuk énda i dara ténu lake, énda méfésagad i de étew bé de sala ro.

²³ I kéluhanay de éntingayén ni dob lawie féngadafan kailangan firikon bé darae. Endob i de ni maak do anlung i toowe gamit i féngadafane dob lawayo saén. Mélaw fatut toow na fo fiyy tulakéne dob tintuwe gamit i féngadafane dob lawayo.²⁴ Mélaw ténu lake Kristowey kaane dara. Atin énda ménahurén dob mékétéfuwe sibéy dob fantade ni non maak anlung i tintuwe féngadafan dob lawayo saén. Atin diyo béniy Kristowey rigoné noy galbék i kéfédewa tome dob adafay Tuluse.²⁵ I gérotore fadi i de Judio mahur dob Toowe Fo Mékétéfu Sibéy sénga bélantuwa, muwit bé dara i ayame fégétulakén. Endob i Kristowey, énda kailanga noy mahure médo gule témulak bé lowoh ne.²⁶ Non amuk kailangan rigoné noy ni sénga bélantuwa, kailangan so mérasay médo gule tidéw bé gaiy kélémbage bé duniyae ni. Endob kailanga no saén i mahure ségule amun gédétén i tamfaday de gai. Atin ménfégito inok kédané

noy sala i de étew sabaf bé kétulak ne bé lowoh ne. ²⁷ I kéluhanay de étew kailanga roy méléhue, tidéw béno kukuméy Tuluse bero. ²⁸ Atin loo so bé ni, téménulak i Kristowe ségule inok mékédan i sala i de medoo étew. Atin séfule mangéy dob duniyaе ni. Endob énda séfuleén inok kédané noy sala i de étew. Yamula séfule mangéy dini inok fégilidé noy kéfukas ne bé de étew mongot-mongot bé késéfule ne.

10

¹ I kitabe niray Moisese, maak anlung i de tintu fo fiyo iray Kristowe saén moso. Mélaw kulang i kitabe sémugu bé fatut témulak i étewe sénga bélintuwa taman sa taman. Non i kitabe énda géféwaléyo no métintuy étewe fégédét dob Tuluse. ² Mélaw i de étew ménéngintulus loo bé sénugu i kitabe, amuk tintu ménwaléy ro damén malinis dob adafay Tuluse, éndaén tete i de fédéw ro fantag bé de sala ro, atin éndaén kailanga roy témulake man ségule. ³ Endob i toowe, gétédémo ro énda séna ménkédan i de sala ro, non kailanga roy témulake sénga bélintuwa. ⁴ Non i dara i de safi taloo no do kambing, énda fakayén kémédan bé de sala.

⁵ Mélaw amun gédétén gégumah i Kristowe dob duniyaе ni, bénréhén dob Tuluse mano, “Enda méuyot go bé de ayam do tulakén dob Beeme. Yamula rénigo moy kagéne lowoh inok been i niy fatute tulakén dob Beeme. ⁶ Non énda mésuwat go bé de ayam tulakén do tuwégén dob ahayane féngadafan brab de tulak fégékédan bé sala i de étew. ⁷ Mélaw, béréhé ku dob Beeme, Tulus, ay niwu inok rigoné kuy kétaya muwe loo bé ménslate fantag

bé begéne dob libro muwe.”⁸ Ay niy sunguwe bénréh Jesuse, “Enda méuyot go taloo no mésuwat go bé de tulak taloo no do ayam tuwégén dob ahayane féngadafan taloo no do tulak fégékédan bé de sala.” Bénréhén i de ni fiyon fo ké been i de niy sénugu i kitabe.⁹ Tidéw bénó, bénréh Kristowe mano, “Tulus, ay niwu inok rigoné kuy kétaya muwe.” Mélaw gétiga tom kénday Tulusey tafaye aguwon tulakay de étew. Atin bénaliwana no bé tulak Kristowe.¹⁰ Rénigo Kristowey kétayay Tuluse rigoné no. Mélaw i kéluhana tome ménwaléy tom malinis dob adafay Tuluse non ménkédanén i de sala tom sabaf bé tulak Jesu Kristowe, sani kaane lowoh. Mélaw éndaén kailangan i ségiyowe tulak.

¹¹ Dob tafaye aguwon, i de Judio do fadi témindég ro dob lawie féngadafan sénga fuweh inok rigoné roy galbék ruwe témulak médoor gule. Gido loo, i de fégétulak ro énda fakayén kémédan bé de sala ro. ¹² Endob i Kristowe, téménulak saén ségule inok ménkédan i de sala. Atin éndaén kailangan i ségiyowe tulak taman sa taman. Tidéw bénó, ménsar i Jesuse fingé dob kuwonoy Tuluse inok méguléw. ¹³ Diyo so béri ongot-ongoté noy gaiwe fétabanéy Tuluse bé de sébanil de. ¹⁴ Mélaw sabaf bé sébaane saén tulak, ménlinis tom tidéw dob de sala tom, atin ménwaléy tom métintu taman sa taman.

¹⁵ Atin wén soy kétoro i Rémogor i Tuluse fantag bé ni. Non bénréhén dob Ménsulate Kébérén i Tuluse mano, ¹⁶ “Begéney Kadnane, atin ay niy mantuwe aguwon rigoné ku inok gétayakufo kuy de étew moso. Sulaté kuy de kitab gu dob de fédew ro brab dob de itunga ro.” ¹⁷ Atin bénréhén man mano, “Endaén fégétédémé kuy de sala ro

taloo noy de tete rigoné ro.” ¹⁸ Mélaw amuk ménfésagadan i de ni, éndaén kailangan i ségiyowe tulak fégékédan bé de sala.

¹⁹ Mélaw, do dumo gu, sabaf bé kéléhu Jesu Kristowe, éndaén kailanga tom i mégilake ké mahur tom dob Toowe fo Mékétéfu Sibéy gonoy Tuluse. ²⁰ Rénigo noy mantuwe aguwon bé kétulak ne bé lowoh ne. Atin i de étew modor bé ni aguwon, méuyag ro taman sa taman. Amun ménbinasay lowoh ne maak rindung i bengaway Toowe fo Mékétéfu Sibéy ménkusi inok géahur i de étew. ²¹ Atin wén i toowe fo gérотор fadi tom, sani Jesu Kristowe. Beeney uléw tome do étew i Tuluse. ²² Mélaw fatut fégédét tom dob Tuluse énda ububo i kéféngadaf tome de, brab énda ruwo-ruwoy de fédéw tom bé kéunur tome de. Fakay i ni non maak ménfirikon tomén bé dara Kristowe fégékédan bé de sala tom inok éndaén fégitungé tom i de sala tom. Atin malinisén i de lowoh tom non bé kébautise betom. ²³ Enda ruwo-ruwoy fédéw tome de. Yamula fatut féégété tom i késarig tome bé nan ongot-ongoté tom, sani fayagé tome dob de étew sani kétumay Tuluse bé fasad ne. Non gésarig tom bé tumané noy fasad ne. ²⁴ Atin fatut fétausé tom i késégédaw tome, brab késétabang tome, brab kérigo tome bé fiyowe. ²⁵ Atin katom térenon i késélimud tome méngintulus loo bé adat tome. Katom iringén i de étew témérén ron sélimud méngintulus. Yamula, fatut séfébagéré tom i de fédéw tom. Fatut fo rigoné tom i ni non éndaén mérugayén tidéw béléewe niy késéfule i Kadnane.

²⁶ Endob amuk fétausé tom i kérigo tome sala fiyon fo ké gétiya tom i toowe kétoro, mén singgula

i kétulak Kristowe atin énda i tulak fégékédan bé de sala tom. ²⁷ Amuk wén i ségétew réménigo bé ni, fatut mégilak bé kékukum i Tuluse. Non wén i gonone aféy fégébinasa bé de étew sébanil bé Tuluse. ²⁸ Bé gétahe, i étewe géfélis bé kitabe niray Moisese, énda méuray i nay de kémukum de amuk wén i ruwo taloo no télew gétew témbô de. Mélaw féléhuén i ni étew ménsala. ²⁹ Amuk loo bé ni, ati keey i mérigowe dob étewe mika bé Nga i Tuluse? Toow fo gétimal i kékukume de non fénggito noy kékarang ne bé énda i laga i dara Kristowe kémédan bé de salaén, sani tandaé bé mantuwe aguwon kay de étew inok waléy ro malinis dob adafay Tuluse. I étewe mika bé Nga i Tuluse, maak fénéngirasén i Rémogor i Tuluse fiyon fo ké ménggédaw i Rémogor i Tuluse de. Mélaw i ni étew médaït fo ké gétimal i kékukume de. ³⁰ Non gétiha tom ménbéréh i Tuluse mano, “Begéney sémulie, Begéney kémukume.” Atin wén soy ségiyowe Ménsulat Kébéréh i Tuluse mano, “Kukuméy Kadnaney de étewén.” ³¹ Toow fo mékaid ké kukuméy Tulusey ségétewe étew. ³² Fégétédém gom i de énggétah do gai, amun mantu séna énggésobuto kom i toowe kétoro fantag bé Tuluse. Fiyon fo ké ménrasay gom, énda téménréni gom munur. ³³ Wén i do no do gai, i de énda munur fénéngiras ro begom dob adafay médoowe do étew atin fénrasay ro begom. Atin wén i no gai fénrasay roy de dumogom, brab ménamung gom bero non ménuray i na gome bero. ³⁴ Atin ménuray i na gome bé de étew do ménfériisu sabaf bé kéunur ruwe. Atin amun éndot roy de tamuk gom, énda ménkérit gom de. Yamula moror gom non gétiha kom wén i

toow na fo fiyo tamuk gom gédoté kom moso, atin énda mékedano taman sa taman. ³⁵ Mélaw, kagom térenon i késarig gome bé Kadnane. Yamula féégét gom i késarig gome de inok gédoté kom i dakéle baras. ³⁶ Atin fatut fetingkél gom inok gérigono kom i kétayay Tuluse brab inok gédoté kom i fénasad ne. ³⁷ Non wén i Ménsulate Kébéréh i Tuluse mano, “Endaén mérugayén, gégumahén i nan ongot-ongoté kom. Enda mélisén. ³⁸ Atin i de métintu do étew gu, gédoté roy umule magufusa non ménunur ro Begén. Endob amuk wén i ségétew bero ménbaleng i fédew ne sabaf mégilak atin éndaén munurén, énda mésuwatu de.” ³⁹ Endob i de betom, do dumo gu, békén betom i de ménbaleng do fédewén brab do témenréne do munur do mékukum ro mélaw. Békén loo bé nan i de rigoné tom, non ménunur tom atin mélaw méfukas tom tidéw dob de sala tom.

11

¹ Ati kéunure? Wén i kéunur tom amuk tintu gétiga tom gédoté tom i de ongot-ongoté tom, sani de éntingayén énda séna gito tom de. ² I de énggéétah do étew, fénsuwat roy Tuluse sabaf bé kéunur ruwe. ³ Sabaf bé kéunur tome bé Tuluse, énggésobuto tom i kélémbag ne bé duniyae ni dob kékéréh ne saén. Lénimbagén i kéluhanay de énggiton tidéw dob de énda do giton.

⁴ I Abele bé do gétah, sabaf bé kéunur ne, nirayén i toowe na fo fiyo tulak dob Tuluse bé tulake niray i ofo ne Kain. Sabaf bé kéunur ne, kénarang i Tuluse métintu, non ténayakufén i tulak ne. Atin sabaf bé kéunur ne, wén soy kétoroén dob betome fiyon fo ké ménléhuén.

5 Atin i Enoke, sabaf bé kéunur ne, énda ménléhuén. Yamula féndiyat i Tuluse atin éndaén énggitoy de étew de non diyoén dob lawayo. Wén i Ménsulate Kébéréh i Tuluse fantag bé Enoke bé ménsuwat i Tuluse de bé énda séna déméniyatén de.

6 Atin amuk énda munur i ségétewe étew bé Tuluse, énda géfésuwata noy Tuluse. Non i étewe fégédét dob Tuluse, kailangan munur bé wén i Tulus brab barasay Tulusey kéluhanay de séméléd de.

7 Atin i Noehe bé do gétah sabaf bé kéunur ne, réménigo barko. Non amun bénréh i Tuluse dob beene bé wén i gérumah dakél dunuk, ménunur de. Mélaw nodoro noy sugu i Tuluse rémigo barko. Atin énda mélaw ménléné i Noehe brab de samungén fiyon fo ké kénukum i Tulusey de ségiyo étew dob duniyae ni. Atin mélaw sabaf bé kéunur ne, fénggito Noehe bé tete i de kéilawan. Atin fénwaléy i Tuluse métintuy Noehe sabaf bé kéunur ne.

8 Atin i Abrahame so, sabaf bé kéunur ne, nodoro noy kékéréh i Tuluse bé kétawag i Tuluse de brab sénuguén mangéy dob ségiyowe ingéd inok gédoté noy fantade fénasad i Tuluse irayén de. Mélaw tétagakén i kaane ingéd sabaf bé kéunur ne, fiyon fo ké énda gétiga noy ayo nuwe de.

9 Atin sabaf bé kéunur ne, ménbati i Abrahame diyo dob fantado no, sani fénasad i Tuluse irayén de. Ménbati diyo maak ségétew miloh saén fiyon fo ké been i niy fantade fénasad i Tuluse irayén de. Ménbati dob safute lawi rénigo no loo so bé nga ne Isak brab bebe né Jakob. Bero soy fénasaday Tuluse de irayén i fantade ni.

10 I Abrahame ni, nongot-nongotén i ingéde dob lawayo, sani ingéde bénantak i Tu-

luse brab rigoné no brab énda mémédano taman sa taman.

¹¹ Atin sabaf bé kéunur ne, i Abrahame ménwaléy boh, fiyon fo ké toowén fo lukés loo soy bawag ne Sarah. Endob fiyon fo ké lukés ron fo toow, séménarig ro dob Tuluse bé tumané noy fasad ne. ¹² Atin mélaw fiyon fo ké toow fo lukésén i Abrahame ni brab éndaén géféoboro noy bawag ne, ménwaléy so katufuay médoowe étew. Ségiléw ro bé kédooy de gitoon dob lawayo brab de farék dob dénsaane.

¹³ I de ni do étew ménunur bé Tuluse, ménléhu ro bé gaiwe énda séna énggédot roy fantade fénasad i Tuluse irayén bero. Gido loo, énda témenrén ro ménunur, non gétiga roy wén i gaiwe moso gédoté roy nan ongot-ongoté ro, sani fénasad i Tuluse bero. Atin fénggito ro bé békén tintu ingéd roy duniyae ni, yamula i tintuwe ingéd ro dob lawayo diyo. ¹⁴ Atin i de étew béléewe ni loo bé niy kékéréh ruwe, fégito ro békén dob fantade niy tintuwe ingéd ro, yamula dob lawayo diyo. ¹⁵ Non i ro Abrahame, énda ménggundoy ro bé ingéde fénled ro. Amuk ménggundoy ro de, wén soy gai géséfule ro mangéy diyo. ¹⁶ Yamula, ménuyot ro fo mangéy bati dob ségiyowe ingéd, sani toowe na fo fiyo ingéd dob lawayo diyo. Atin i Tuluse énda mélaw mémala no ké fédawétén Tulus ro. Non térafayén i ingéde batioy de ni étew.

¹⁷⁻¹⁸ Atin sabaf bé kéunur Abrahame bé Tuluse, irayén damén i nga ne Isak fégétulakén dob Tuluse. Toow fo fédewén miray bé buntunge ngaén fégétulakén fiyon fo ké wén i fasad i Tuluse de mano, “Bé nga me Isak, waléy go katufuay

médoowe étew.” Atin fiyon fo ké fénasaday Tulusey Abrahame loo bé ni, ténéngkadén soy Abrahame féléhué noy nga ne. Atin ménodor i Abrahame bé sugu i Tuluse. ¹⁹ Non gétiga Abrahame gétébuleoy Tuluse soy Isake. Atin maak ténébule i Tuluse so non amuk énda génlé i Tulusey Abrahame, féléhué noy nga ne Isak.

²⁰ Atin i Isake amun lukésén, sabaf bé kéunur ne bé Tuluse, nongotén dob Tuluse bé féfiyoné no mosoy de ngaén, ro Jakob brab Isaw.

²¹ Atin i Jakobe, sabaf bé kéunur ne bé Tuluse, amun gédétén méléhu, nongotén dob Tuluse bé féfiyoné noy séngae bebeén, sani de nga i nga ne Jose. Rénigo noy ni bé lala ne séménanday dob tugé ne fénéngadafén i Tuluse.

²² Atin i Josehe so, sabaf bé kéunur ne bé Tuluse, amun gédétén méléhu, bénréhén i fantage bé kéésut i de séfuén, sani de Judio, tidéw Egipto. Atin bénréhén so bé fatut uwité roy bangkay ne ké mésut ro.

²³ Atin i de lukés Moises, sabaf bé kéunur ruwe, bénunéy roy nga ruwe Moises taman télew gétérésang kélungonon i idad ne. Non i datue dob Egipto, sénuguén bé féléhuén i kéluhanay de nga lagéy i de Judio. Endob i de lukés Moisese énda ménggilak ro mémélis bé ni sugu, non ménunur ro bé Tuluse. Atin énggito ro toow fo fiyoy nga ruwe.

²⁴ Atin i Moisese ni so, sabaf bé kéunur ne bé Tuluse, amun métuwanén étew, ménika de ké fédawétén nga i libune nga i Datue dob Egipto. Rénigo noy ni fiyon fo ké toow fo fiyoy goho nuwe dob lawi i datue gono no ménruk. ²⁵ Endob sabaf bé kéunur ne, mas ménuyot mérásay séréngan bé

de dumo no do étew i Tuluse bé singkowe saén kéféguyaya muwit sala. ²⁶ Fénggitungén, mas fiyo ké mérarék i de étew de sabaf bé kéunur ne bé Kristowe gégumah moso bé kéluhanay de ungangén dob Egipto gédoté no. Non gétiga no toow na fo fiyoy baras ne gédoté no tidew dob Tuluse moso.

²⁷ Atin sabaf bé kéunur ne, méntékédan i Moisese dob Egipto fiyon fo ké mékerit i Datue de, non énda mégilakén. Atin ménfédayday dob de gai do mérégén non maak gito noy éndae giton Tulus manangguwit de. ²⁸ Atin sabaf bé kéunur ne, rénigo noy kandulie féndawét “Témara”. Mélaw sénuguén i de Judio mémirik bé dara i bili-biliwe dob de fintu i de lawi ro inok i télakiwe méméléhu taraa no saén i lawi i de Judio atin énda féléhué noy de ofo nga dob séngae lawi loo bé rénigo nuwe dob de étew dob Egipto.

²⁹ Atin sabaf bé kéunur ruwe bé Tuluse, amun ménusut i de Judio tidew Egipto énggéifar ro dob dogote féndawét “Furo Dogot” maak ménagéw ro dob tikare fantad. Endob amun ténundug i de sundalo tidew Egipto bero atin témenlama ro mifar, ménléné ro kéluhanan non ménséfule i wayége.

³⁰ Atin sabaf bé kéunur i de Judio, ménrundas i émbagére diding géliwét bé ingéd i de sébanil bero féndawét Jeriko. Non ménodor ro bé sugu i Tuluse bé agéwé ro liwétén sénga fuweh taman fitew gétérésangan. Tidew bénó, rénundas i Tuluse. ³¹ Endob bati diyo so dob Jerikoy sundale libun féndawét Rahab. Atin sabaf so bé kéunur ne, énda ménléhuén séréngan bé de étew dob ingéd ne do mémélis bé de sugu i Tuluse. Non ténayakufén i de sénarigoy odoroy de Judio, sani de sénugu ro témulik

bé kébagér i no ingéd. Endob sénékém ro saén i kétulik ruwe de.

³² Témérénun muret fantag bé de énggéétah do étew ménunur bé Tuluse, loo bé ro Gideone, ro Barak, Samson, Jeffe, Dabid, Samuel brab sénarigoy Tuluse muret bé kébérél ne. Non kulang i gai guwe muret fantag bé kéluhana ruwe. ³³ I de dumō bero, sabaf bé kéunur ruwe, ménsétiboh ro bé de ségiyo do dakél ingéd atin téménaban ro. Méngguléw ro métintu, atin énggédot roy fénasad i Tuluse. Atin i de dumō bero énggétigémo roy ba i de mérayar brab do émbaraw dakél binatang féndawét leon inok énda gékekeo ro bero. ³⁴ Atin i de dumō bero sabaf bé kéunur ruwe, énda méntuwégi ro dob de toow fo dakél do aféy. Atin i de dumō bero énda ménléhu ro bé de sundang i de sébanil bero. Fiyon fo ké mélubay ro, ménwaleý ro émbagér sabaf bé kéunur ruwe inok gétabana roy de sundalo sébanil bero tidéw dob de ségiyo ingéd. ³⁵ Atin wén soy de libun bero méntébule i de nga ro sabaf bé kéunur ruwe.

Atin i de dumō bero, ménléhu ro bé kéférasaye bero, non ménika ro tangéyén. Mas ménuyot ro mérasy brab ménléhu inok tébule ro brab gédoté roy toowe na fo fiyo kéfaguyag. Rénigo roy ni sabaf bé kéunur ruwe bé Tuluse. ³⁶ I de dumō bero de munur, déniyangka ro bero brab bénadas ro bero. Atin i de dumō bero, nikét ro brab fénrisu ro bero. ³⁷ I de dumō bero, ménléhu ro bé kéibérone bero batéw. Atin i de dumō bero, sénufak ro bero bé ragarie. Atin i de dumō bero, téníboh ro bero bé sundange atin ménléhu ro. Atin i de dumō bero, énda i do kégal ro saliyu bé kulit i de bili-bili brab

do kulit kambing. Toow ro fo méskinan brab toow ro fo ménrasay. ³⁸ Atin i de dumo bé de munur ni, énggétagaka roy de lawi ro brab ménangéy ro bati dob de gonon énda i do étew de bati brab dob de tuduk, brab dob de takub brab dob de tosong fantad non ferasayén ro. Enggiton énda fo médat i de tete étew sétifon dob duniyae ni bé de ni do fiyo étew munur bé Tuluse.

³⁹ Toow fo ménswat i Tuluse bé de ni do étew sabaf bé kéunur ruwe. Gido loo, énda séna énggédot roy fénasad i Tuluse irayén bero. ⁴⁰ Non bénantak i Tuluse betom i toowe na fo fiyo aguwon. Mélaw kailanga ro ongot-ongot betom do étew béleewe, inok tumané noy fasad ne bero séréngan betom.

12

¹ Mélaw gétédémo tom i de médoó do énggéétah étew do méégét ro munur bé Tuluse. Atin maak téngtengé ro betom béleewe ni. Atin i betome, maak sékuya tom bé lala ruwe téméngténg. Mélaw fatut tagaké tom i de éntingayén funa tom métana léméntu. I atag i ni kébéréh gu, fatut tagaké tom i de sala funa tom énda gérigo bé kétayay Tuluse. Atin fatut mégéror tom rémigo bé galbék i Tuluse. ² Atin fatut féégété tom i kéfégitung tome fantag bé Jesuse, sani émféunure betom brab émféégéte bé kéunur tome. I Jesuse, féndayaén i de étew kémelabo de dob kruse. Atin fiyon fo ké mémémalay kéléhu ne dob kruse, énda fégitungé no de. Yamula fénggitungén i kéoror ne ké gilid i kérasay ne. Atin béleewe ni diyo ménasar fingé dob kuwonoy Tuluse méguléw.

³ Fétuntay gom i ménrigowe dob Beene. Féndayaén i de tete étew émférasay de. Mélaw i begome, fatut fébagér gom i de fédew gom brab kagom témerén munur, fiyon fo ké wén i émférasay begom. ⁴ Non fiyon fo ké atuho kom i salae, énda séna féléhuén gom sabaf bé kéunur gome. ⁵ Aw énggélifo komén i kékéréh i Tuluse dob begome do ngaén, sani kékéréhe émféfiyo bé de fédew gom? Bang i Tuluse, “Nga gu, fétuntay go ké fifité ku beem sabaf bé de salaém. Atin kago tete i fédew me de ké fifité ku beem. ⁶ Non i de étew fifité ku ké mésala ro, beroy de étew kégédawa ku. Atin i de étew fifité ku ké rémigo ro tete, beroy de étew tényakuf gu maak do nga gu.” ⁷ Mélaw amuk mérásay tom, tingkél gom atin fégitung gom maak fifité boh gome begom sabaf bé de sala gom. Non amuk kérásayan gom, gétiga kom i Tuluse tényakufén begom maak do ngaén. Non i kéluhanay de boh, fifité roy de nga ro amuk rigoné roy tete. ⁸ Atin amuk énda fifitéy Tuluse begom ké mésala gom, békén gom do tintu ngaén, éndob do ngaén saén dob liyuwe. ⁹ I de katom boh dob fantade ni, fifité ro betom ké rémigo tom tete. Atin mélaw basana tom bero. Mélaw, toow fo fatut ké fédayaé tom i Tuluse méguléw betom. Non Beeney Abay tome dob lawayo atin irayén betom i umule magufusa ké rigoné tom i ni. ¹⁰ I de katom do boh dob fantade ni, fifité ro betom ké nga tom séna, loo bé gékaranga ruwe fiyo. Endob i Tuluse fifité no betom inok tabanga no betom minut métintu loo bé kétintu nuwe. ¹¹ Amuk fifitéy Tuluse betom, mika tom de bé no gai brab tete i de fédew tom de.

Endob sabaf bé ni moror tom de moso ké gégumah i gaiwe waléy tom métintu brab métanék i de fédéw tom.

¹² Mélaw, do dumo gu, amuk maak lugotén gom rémigo bé kétayay Tuluse féégét gom i kéunur gome.
¹³ Taus gom agéw dob métintuwe aguwon inok i de étew énda séna méégét i kéunur ruwe, amuk gito ro begom énda minut ro mélubay, yamula minut méégét i kéunur ruwe.

¹⁴ Rigo gom i kéluhanay de gérigono kom dob kéluhanay de étew inok énda gésékérit gom. Atin fétintu gom sénga tékélid, non amuk énda métintu gom, énda gito gom i Kadnane moso. ¹⁵ Atin ingat gom inok énda i ségétew begom témérén témayakuf bé kégédaw i Tuluse. Non i étewe loo bé ni ségiléw bé nohoke féla brab bisay onok ne, non mégukét i de munur. Atin been i niy funay de dumo no munur waléy so gésala. ¹⁶ Atin ingat gom inok énda i ségétew begom waléy mékérésik i adat ne taloo no diguré noy Tuluse, loo bé rénigo Esawe bé do gétah. Non énda génulaa noy kuwagib ne tidew dob Tuluse. I kuwagibe ni kaan, non been i ofo. Endob fénbélényen i kuwagib ne dob tuwaréy ne inok géama saén ségule. ¹⁷ Gétiga kom, tidew beno ménuyot de ké ongotéy boh ne dob Tulusey féfiyoné no. Endob éndaén fakayén, non fiyon fo ké kémérew, éndaén méfégalin i rénigo nuwe bé kéféluluk ne bé kuwagib ne inok gédoté no saén i kaamae.

¹⁸ I aguwo tome mangéy dob Tuluse, énda ségiléwén bé aguwoy de katufua tom do Ju-dio. Non fénfégédét ro dob sébaane tuduk gito

ro, sani tuduke féndawét Sinai gonoy mérinoe aféy. Délémon diyo non bé mégéfole rawén brab émbagére réfuruuh. ¹⁹ Atin bé beno, ménbéréh métanug i témburiwe brab méntanug i kékéréd i Tuluse. Atin i de étew diyo, amun énggelingoo roy ni émbéréh, nongot roy éndaén damén émbéréhén ségule, ²⁰ non toow ro de fo ménggilak. Non ménbéréh mano, “Amuk wén i kémuwah bé tuduke ni, fiyon ayam, kailangan féléhuén ibéron batéw.” ²¹ Atin toow fo mékégilak i no gonon gito ro. Mélaw ménbéréh i Moisese mano, “Lémukubu bé kégilak guwe.”

²² Endob i betome, békén loo bé nan i kékédét tome dob Tuluse. Non maak magéw tom dob tuduke Sion gonoy ingéd i méuyage Tulus. I ni ingéd féndawét Jerusalem diyo dob lawayo, gonoy firoye ngibu télaki. ²³ Maak fégédét tom dob de sungu nga i Tuluse, sani de étew ménsulat i de dawét ro dob lawayo. Diyo ro ménlimud toow fo moror. Atin fégédét tom dob Tuluse, sani kémukume bé kéluhanay de étew. Atin ménfégédét tom so dob de rémogor i de ménléhu do métintu étew, sani de fénwaléyén do toow fo métintu dob lawayo. ²⁴ Atin ménfégédét tom so dob Jesuse, sani réménigowé bé mantuve aguwon inok gétanggafay Tulusey de étew. Atin ménfégédét tom so dob dara Jesuse fénirik. Toow na fo fiyoy dara Jesuse bé dara Abele. Non i dara Jesuse been i tanda i kégédaw i Tuluse. Endob i dara Abele, been i tanda i kékukum i Tuluse.

²⁵ Mélaw ingat gom inok énda mika gom mégélingo bé kékéréd i Tuluse. Non ménkukum i de énggéeétah do étew ménika mégélingo bé Moisese

sani sénarigoy Tuluse muret bé kékérén ne dob duniyae ni. Mélaw i betome so, amuk énda munur tom bé kékérén i Tuluse tidéw dob lawayo, toow na fo énda gésélyah tom bé kékukum i Tuluse. ²⁶ Bé do gétah, ménkuyung i duniyae non ménbérén i Tuluse. Endob béléewe ni, wén i fasadén mano, “Kuyungé ku man ségule i duniyae brab lawaye so.” ²⁷ Ay niy atag i ni kékérén: Mékédan i de éntingayén do mékuyung, sani de lénimbag i Tuluse. Mélaw i de éntingayén énda mékuyung ro énda mékédan ro.

²⁸ Mélaw fatut fésalamat tom dob Tuluse, non géahur tom dob kénéfugléw i Tuluse énda mékuyungén taloo no mékédan. Fatut féngadafé tom i Tuluse loo bé kétaya nuwe de. Atin fatut basana tom i Tuluse brab mégilak tom mémélis bé de suguéen. ²⁹ Non aféy i fégékukum i Tuluse.

13

¹ I betome do sédumon munur bé Kristowe, fatut fétausé tom i késégédaw tome. ² Katom lifotén i témayakufe bé de étew énda séna gélolo tom de dob de lawi tom. Wén i de étew ténayakuf roy de étew énda séna gélolo ro bero, éndob i toowe, ténayakuf roy de télaki, éndob énda gétiga ro de. ³ Atin kagom lifotén i de férisu. Fatut méuray i na gome bero maak begom soy de ménférisu diyo dob berowe. Ségiléw so bé de merasay, fatut méuray i na gome bero maak begom soy kérasayan, brab fatut fagifat gom bero.

⁴ Atin fatut basana kom kéluhanan i késébawage. I de sébawag fatut énda sétayan ro bé de ségiyo. Non kukuméy Tulusey de étew sétayan ro saliyu bé bawag ruwe brab de bigaén.

⁵ Atin kagom fésubranén i kétaya kome bé kurtae. Fatut kasukudan gomén bé wéne dob begome. Non bénréh i Tuluse mano, “Enda tagaké ku begom, taloo no fédayaé ku begom.” ⁶ Mélaw sabaf bé késarig tome bé Tuluse, fatut béréhé tom matom, “Kadnan i témabangane begén. Mélaw énda mégilaku bé de étew brab kérigo ruwe begén.”

⁷ Fégétédém gom i de énggéétah do odoron, sani de sénarigoy Tuluse muret bé kébéréh ne dob begome. Fégitung gom i de fiyo adat ro brab de rigoné ro taman kéléhu ro. Iring gom i kéunur ruwe. ⁸ Non i Jesu Kristowe, énda émfégalino. Yamula ségiléw so tidéw féganay taman béléewe ni, brab taman sa taman. ⁹ Atin kagom munur bé de ségiyo-giyo kétoro funa kom témérén munur bé toowe kétoro. I kégédaw i Tuluse féégetté noy kéunur tome. Endob i kéodorone bé de sugu bé atiy de amaén énda géamaa tom de, énda fo féégetté noy kéunur tome. I de étew odoro roy de ni do sugu, énda gétabanga no bero.

¹⁰ I betome do munur bé Kristowe, wén i tulak tom, sani Jesu Kristowe. Endob i de fadi i de Judio, sani de témulak séna dob lawie féngadafan dob Jerusalem, énda i kuwagib ro mama bé katome tulak. ¹¹ Gétiga tom amuk témulak i de Judio, i gérotore fadi i de Judio, muwit bé dara i ayame témulak mangéy dob Toowe fo Mékétéfu Sibéy inok irayén dob Tuluse inok kédané noy de sala. Endob i de lowoh i de ayam do fénléhu, métuwégi dob liyuy ingéde. ¹² Been i niy funa Jesuse ménléhu dob liyuy ingéde Jerusalem, inok kédané noy de sala i de étew bé dara ne inok mélinis ro dob adafay Tuluse. ¹³ Mélaw fatut mangéy tom dob liyuy ingéde inok géfégédét tom dob Beene. I atag i ni,

fatut tagaké tom i adat i de Judio inok sémarig tom saén bé Jesuse. Fatut rigoné tom i ni fiyon fo ké fémalané ro betom séréngan bé Kristowe. ¹⁴ Non énda i ingéd dob fantade ni gono tom batitaman sa taman. Yamula ongot-ongoté tom i tintuwe ingéd tom batio tom moso. ¹⁵ Mélaw fatut dayewé tom démoyun i Tuluse, atin fayagé tom i kéunur tome bé Jesuse. Non been i nan i maake kétulak tom bé Jesu Kristowe, sani fadi tome. ¹⁶ Atin kagom lifotén i rémigowe fiyo brab sétabang gom, non i ni adat maak tulak so émfésuwat bé Tuluse.

¹⁷ Fatut odor gom bé de sugu i de odoro kom do munur bé Kristowe. Non beroy de démoyun témulama bé kéunur gome inok minut mégét. Non wén moso i gai susinéy Tulusey de galbék ro ké fiyo taloo no énda. Atin amuk modor gom bé de sugu ro, moror ro gémalbék. Atin amuk énda modor gom bé de sugu ro, waléy tete i de fédew ro atin énda tabanga ro begom.

¹⁸ Fétaus gom i kédasala kome begey. Gétiga key énda i rénigo gey tete non témenlama gey rémigo fiyo sénga tékélid. ¹⁹ Atin ongoté ku dob begome dasala kom begén dob Tuluse inok géséfuleu magad mangéy dob begome.

²⁰ Ténébule i Tulusey Kadna tome Jesu Kristo. Atin amun ménléhu i Jesuse, i dara ne ménwaléy tanda i mantuwe aguwon rénigoy Tuluse inok tanggafé noy de étew. I ni aguwon énda mékédano taman sa taman. Atin sabaf bé kéléhu Jesuse maak Beeney toowe fo fiyo témalima begom do maak bili-bili. ²¹ I Tuluse fétanéké noy de fédew, irayén damén begom i kéluhanay de kailanga kom inok

gérigono kom i kétaya nuwe. Atin tabanga Jesuse damén betom inok gérigono tom i funay Tuluse mésuwat. Médayéw damén i Jesu Kristowe taman sa taman. Amen!

²² Do dumo gu, ongoté ku begom bé fétingkél gom mégélingo bé ni sénulat gu funay de fédéw gom émbagér. Non énda métaah i sulat guwe ni begom.
²³ Méuyotu de ké gétiga kom i fantage bé dumo tome Timoteo. Mémentangéyén tidéw dob férisunone. Amuk magad damén i kégumah ne dini, géodor begén ké angéyé ku begom tukawén.

²⁴ Ségifa gom begey i kéluhanay de odoro kom do étew i Tuluse. Atin i de dumo gom munur bati dob ingéde ni Italiya, ségifaé ro begom.

²⁵ Mégédaw damén i Tuluse begom kéluhanan.

I Fiyowe Uret New Testament in Tiruray

copyright © 2002 Wycliffe Bible Translators, Inc.

Language: Tiruray

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9718260234

The New Testament

in Tiruray

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files

dated 29 Jan 2022

b0fb0c95-f209-5a97-9de8-b336c1289708